

商山朴氏世譜序

朴氏在我東最稱盛族分籍甚多而其源實皆出於新羅王若夫貫於商山者即其一也白麗朝紫金魚袋公以至貞肅公五昆季而德業益盛是後簪組奕葉相承有若松村道源齋二先生之學問名節慶恩堂三世之潛德懿行特被吾先祖華陽夫子之偉筆闡揚卓卓炳炳非他族之可比矣雖不無近代之不振而其儒業之交修孝友之不絕可知夫靈芝醴泉必有根源也惟其舊有譜牒而今又闔族相與發議增修以重刊慶恩公雲孫昌源托余以弁卷之文曰諸宗之願也余辭不文其請甚力噫族之有譜古矣而叔季衰俗尤宜明於譜也明於譜者實所以收宗族而厚風俗立忠義而益朝廷也凡譜於斯者苟能有覩乎程張所訓則是譜之修不徒爲考閱世派而已其於尊祖敬宗保族宜家殆庶幾焉歲時花樹之會盍相與惕勵益致敦睦也哉余於斯譜竊有興感者深庸識之如此云

時著雍執徐中秋節德殷宋曾憲序

我國之族姓亦多而世獨推朴氏爲稱首蓋觀中國士大夫記述繫世在明宋而推之歷唐晉漢以達乎三代虞唐者有之可謂遠矣我國偏陋其知所自來者遠不過自本朝而及麗初羅季近則麗季止耳唯朴氏本於新羅始立王歷九百九十有二年與高麗四百七十有五年至本朝行且三百八十有餘年則自始迄今爲千八百四十年有餘此其最遠故朴氏爲我國族姓之首云新羅朴氏王終於景哀景哀之子八人分封於尙州者子孫遂爲尙州朴氏嘗有譜作於故承旨日省至其立孫生員壽奎與其族人壽鼎謀增修爲書壽鼎來問序於余余辭不獲則曰朴氏之傳姓誠遠矣然自夫松村先生文剛公昆弟有名已卯間與趙文正先生同志同傳而朴氏益顯夫己卯何貴焉以當時之學士大夫入則業孔孟程朱出則道臯夔伊周以死不悔爛焉與日月爭光耳茲其爲國家之盛

際而朴氏與在豈不偉哉不然雖極本窮源至億萬世之遠而富貴相望其間何足觀也是知譜因人而重而人不得因譜而重矣且松村公兄弟在時無族譜而其樹立如彼所爲揚顯其祖先者大矣譜雖不作無損焉今作是譜而因以念松村公兄弟之令德怵惕敬愛人知所趨家知所帥思無忝其爲名賢胄裔則族譜又曷可少哉抑吾子與生員君窮居食貧而能積誠力以舉此事其倡先族人不負其作譜之意也可信無疑是爲序

崇禎後三還甲午陽生前五日清風金鍾厚序

東方氏姓朴爲首出而最著有國者前後共十世凡二百有三十八年而厥後子姓漸蕃支分派別各殊封貫世代玄遠遍滿國中籍于尙州者即其一也中逸不傳以紫金魚袋公始著代焉歷四世判書公貞肅公并顯于太宗朝至松村道源齋兄弟當 中廟盛際以賢良著聞吾先祖文

正公記安谷書院事實而闡揚甚悉朴氏之文獻於是乎可徵矣余觀人家譜系其貴顯蕃茂固不少而清名直道如道源先生者蓋亦無幾人之覽世譜者亦當興感而起敬況其有光於祖先與榮於宗族爲如何哉嗚呼以先生之才學不得卒究其用而遽罹黨禍止於中身又絕後嗣福善之理果安所徵慶恩公父子以先生傍裔克世文行而後孫近甚凌替豈人家禍福亦關氣數而不假人爲耶抑亦天道之不能無憾者也夫譜者所以原本而收宗也苟能惇孝悌而立忠義承先裕後係族宜家則德由是而厚焉福由是而綏焉曷不益熾而漸昌也哉舊有譜而已過一周甲今又增修而重刊之以余有舊契慶恩公五世孫最定來請弁文云

崇禎後四壬子孟夏日恩津宋達洙序

夫人之有祖猶木之有根培其根而枝葉繁茂尊其祖而子孫益著有其孫而不可無是譜譜也者辨昭穆敦本支將以證信於久遠者也惟我商山氏族肇于八大君分封之後而沙伐王諱彥昌居其二也其後屢經兵燹文獻不可考則中間傳繼玄遠無證矣及至麗朝副使紫金魚袋公諱甄爲中葉鼻祖而繼承文籍僅若晨星多有未詳悉者而崇禎紀元後甲午譜則惟我生庭五代祖考諱壽鼎通德郎公族祖諱壽奎生員公養庭五代祖考諱振道生員公以孝行學識現于世而同祖子孫散在京鄉無載籍考信則將爲路人莫知相愛也爲是之懼峻發正論修成譜牒明昭穆繼子姓豈不盛哉其後壬子我先曾祖考諱最定公先爲發論奔走京鄉修單聚合因成譜事茲非後孫之萬幸歟其後子孫之繁衍時代之變遷可謂滄桑換局矣去壬辰年分先祖考諱永範公從祖考諱耆範公亦爲修譜之意發通于八路諸族一齊修單譜所定于南陽安谷松村公文

剛公書院齋閣自初春爲始校正至四五朔了畢時適極暑盛炎故以待來秋生涼之時刊出之意牢定確議姑爲中止矣其後數三人誣傳于南陽校正冊子侍來于尙州南長寺刊出了畢之際我先祖考聞其聲而作尙州之行察其刊出冊子則不啻校正變更淵齋宋先生所撰貞肅公墓表上十七字濫爲刪削是豈爲完譜也即欲更刊然緣於財政未及因爲置之矣何幸年前益山族姪叅奉熙一委訪語及譜事余蹶然而起執其手而對曰君其有志則吾亦宿願卽爲發程用行京鄉與諸族爛議則事多難處有意莫遂者于今三載今戊辰春叅奉熙一又訪謂曰譜若不成則於他人笑嘲何卽爲發通各處宗議僉同因爲收單之際黃海道瑞興郡宗人行祚新溪郡宗人周鉉來到行祚則諱美昌叅判公三次季氏諱文昌後裔也周鉉則諱安智判書公後裔也惟我十五世祖諱忠義禮智信五兄弟分而但諱安義判典農商巖公諱安禮判書公諱安信貞肅公

后裔三派同譜而二派漏譜未知其何以然也今來周鉉即諱安智判書
公後裔今忽四派同譜是或先祖之靈有助於冥冥之中而然耶貞肅公
派宗支之論甲午壬子譜凡例云宗派來歷雖有可據其文獻或有所不
詳悉者則姑附別錄以俟後之知者焉淵齋宋先生所撰貞肅公墓表上
明爲確證諱安智判書公派自先祖留來世系上又有明證故依此修譜
惟願諸族世世承承聿修厥德無忝爾所生而是所顛望焉

著雍執徐九月 日

後裔昌源謹識